



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Meghalaya nung infrastructure
shitak maliba school aika lir

Bangladesh rongsenkettung
ainba nung India-i yaritsü

VOL. XIX NO. 71 (ADOK 71) DIMAPUR KÜPTOKNÜ (SATURDAY) LUCHII (DECEMBER) 18, 2021 ₹ 5.00

Naga nungeri temeten meshir & AFSPA agientsü akhanger



Advisor Samujjal Bhattacharya aser tangartem liasü.

Governor Prof Jagdish Mukhi maliba agi parnoki Commissioner and Secretary to Governor's Secretariat Nagaland, T Mhabemo Yanthan nem shidiji agütsü.

PM Modi dangi memorandum nung NSF-i AFSPA 1958 tangsa agientsü aser Indian Armed forces-i tashiyim inyakba nung takoksa angur ajak nem temeten meshija lir.

India ya alima nung democracy tulutiba ta konang agia jembir saka nübertem ajembanga ayur aser meimchir talitsü yim melidaktsür, ta parnoki Prime Minister dang ashi.

AFSPA (as amended in 1972 and 1986) ajanga India military aser paramilitary nem tashi ulura agütsür ta NSF-isa ashi.

"Naga nunger küm 60 tema India sorkar kübok reshikangshia arur. Onok yim aser alu aiben mi agi rongdoktsüba onok tenük agi nguogo. Indian Army-i Ozü tetsütem aser adianatsürtem maaksüdaktsüogo, teburtem warrant kecha melii pua tepuokdak yuogo, ozü putiotsü zülushio go aser lisopur o sobaliba inyakyim mezüngmeshio go" ta parnokisa metetdaktsü.

Naga nunger tepsetba shia parnoki medals, awards, aser konang angru aser Indian sepaitemi tashiyim mapa inyakba atema okadak ken o benoka mangadanger, ta parnokisa ashi. (Maneni tapak 10 nung...)

Kohima, December 17, 2021 (TYO): Hokolbarnü Naga nunger kaketshir aser lanur meyrjang aika "Peoples' Rally" nung denogo aser parnoki tai maketba nisung 14 nem temeten meshiba den Union Home Minister Amit Shah-i yimjak nung

tatok meshitsü aser tangsa AFSPA agientsü takhangbatem agütsü.

Naga Students' Federation (NSF)-i Konyak Naga nunger külemi noktaka Old MLA Hostel junction nung iba sentong ayonga agi.

Nagaland aser North East State tem nungi Armed Forces (Special Powers) Act (AFSPA) agienang ta takhangba agüja iba sentong agiogo.

Tanü sentong nung higher secondary aser colleges kaketshirtem den Kohima nung kin telok balala nungi nisungtem aden. Parnok dak alia North East Students' Organisation (NESO) aser All Assam Students' Union (AASU) nungia teshimtet nübotem aden.

Iba sentong atema NSF-i shishilembar nem tetuyuba kecha magütsü saka sentong metembang tashi Old MLA Hostel junction temeket nung aliba dokantem ajak shibanga liasü.

Tanü sentong nung adenertemi "Nagas are not terrorist", "Ban AFSPA not our voice", "AFSPA rears devil in Indian Army", "Nagas want peace not atrocities", "Solution not AFSPA", "Stop the undeclared war upon civilians", "Stop dehumanizing Nagas", "Justice for Oting victims" tezülubatem amer lungkak ait.

Old MLA Hostel junction nung sentong agiba sülen parnoki Raj Bhavan-i oa Prime Minister Narendra Modi dangi züluba memorandum ka agütsü.

Iba mapang NSF president Kegwayhun Tep, Peoples' Rally organizing committee convener Vipopal Kintso na den NESO

COVID-19 Nagaland: 1 dak putet & 2 taneptsü angu

Kohima, December 17, 2021 (TYO): Nagaland nung Hokolbarnü nisung 1 dak COVID-19 putet aser 2 taneptsü angu.

"Tanü Dimapur nung nisung ka dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nisung 3 taneptsü anguba züingsema 30,312 kümogo aser ibaji taneptsü angur 94.24% lir, ta paisa ashi.

Tang nisung 83 anepaludar saka parnok 66 dakbo shirangba yimya kecha mali, ta paisa shisem.

"Brihostibar tashi nung nisung

756,231 nem COVID-19 vaccine indang dose 13,25,579 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,983, healthcare workers 16,004, arishi küm 45 ser tempur 213,367 aser arishi küm 18 nungi 44 tsüingda alir 465,877 lir, ta paisa ashi.

Vaccine agirtem rongnungi nisung 569,348-i dose anaprong agiogo. Parnokji frontline workers 48,581, healthcare workers 13,533, arishi küm 45 ser tempur 177,525 aser arishi küm 18 nungi 44 tsüingda alir 329,709 lir, ta Dr Thurr-isa ashi.

NE lisopur ajak Naga nunger den lir: NESO

Dimapur, December 17, 2021 (TYO): Naga nungeri temeten aser AFSPA agientsü atema rara nung North East nung aliba lisopur ajak dena lir ta NESO advisor Samujjal Bhattacharya-i ashi.

Union Minister Amit Shah-i Parliament nung osang tai agütsüba aitsür aser pai yimjak nung tatok meshitsüla, ta paisa ashi. Tanü NSF-i ayongba "Peoples' Rally" nung pai iba osang metetdaktsü.

"Iba khuret ya Nagaland kija atema masü saka North East ajunga indang khuret lir ta Centre sorkari angatetsüla. Nübertem state balala lemsar ali nunga temolungjang aser tanüla ka dang lir" ta Samujjal Bhattacharya-i metetdaktsü.

AFSPA ya Nagaland nungi dang masü saka North East region ajunga nungi agientsüla.

NESO den külemi NE kaketshir teloktemi temeten mangu tashi mapa inyaktsü, ta paisa ashi.

Oting aser Mon nung tai maketba civilian 14 tepsetertem ozüing tapet agi merenshitsü akhanger, ta Bhattacharya-isa shisem.

"Naga nunger küm aika AFSPA kübok lia arur aser iba ajanga azü aika tokshiogo" ta Angami Public Organisation vice president Neivor Rutsa-ia ashi.

"Centre-i Naga nunger ya pei senso ama mebilemra, onok balaka yujang. Nagaland nung aser tangalen aliba Naga nunger ajak külemi longjemer asen tarutsü atema inyakdi" ta pai ayongzük.

India sorkari asen Naga lima nung civilian tem dak armed forces tashi amshiba atema Naga nunger aoksar, jashir aser mangyimer, ta NSF president

Kegwayhun Tep-ia ashi.

"NSF-i temeten mangu tashi aser AFSPA magien tashi raratsü" ta Tep-isa ashi.

Iba sentong nung Forum for Naga Reconciliation member Dr P Ngully-i nübertem o jembi, Naga People's Movement for Human Rights secretary general Neingulo Krome-i AFSPA kübok Naga nunger aliba, Prof Rosemary Dzuvichu-i tetsü ka indang timtem aser Eastern NSF vice president Sepikyu J. Sangtam-i Oting otsü lemsatop.

Sentong nung mendenji Organising Committee convener Vipopal Kintso liasü, Kohima Baptist Pastors' Fellowship president Dr Kevichalie Metha-i temoatsü meshia sarasadem, Oriental Theological Seminary-i ken ka aten aser NSF general secretary Siipuni Ng Philo-i anküp tepela o jembi.

ASÜPILA SENTEP SENTONG



30:01:1965 - 17:12:2021

Asür B. Mangyangtemjen Lemtur
(Deputy Director, Food & Civil Supply)

den tepila sentep sentong December 18, 2021 (Saturday)
nikongdang 1:30 PM nungi par kidang Lengrijan (Dimapur), Lemtur
Senten 179, Lane 4 nung alitsü renema lir.

Dimapur nung Ao Kaketshirtemi Christmas jeli ayongzük



Tanü Jubilee Park Dimapur nung Ao Kaketshirtemi ayongzükba Christmas jeli sentong nung Sashi & Asen aser Imli Imchen Jim Reeves nungertemi ken atenba noksa nung angur. (Dimapur, December 17, 2021).

Dimapur, Dec. 17 (TYO) : Dimapur nung Ao Kaketshir Telongjem meyong Jubilee Park aser Yimkong Sidewalk Management Committee purtemi Jubilee Park nung au agi yangluba ki ka meshitetba den külemi Christmas jeli sentep sentong ka Hotel Saramati anasa Jubilee Park nung Hokolbar nikongtsütsü ayongzükba agiogo.

Iba sentong nung Dimapur Ao Baptist Pastors' Fellowship nung tir aser Ao Baptist Arogo Diphupar nung sannüker, Wb.N.Lipok Jamiri Christmas

osang aben aser Ao Senso Telongjem Dimapur nung tir Wb. Meren Longchari Christmas tayongzükba agüja liasü.

Iba sentong nung Christmas ken Sashi & Asen aser Imli Imchen (Naga Jim Reeves) nungertemi Christmas ken tener külen, ano, telokia külemi osangtajung ken kaket nungi Christmas carol ken DABA nung lanur lenir Wb. Jungshimaneni anir longsulongsua tena liasü.

Iba sentong nung tepela o AKTD tir Wb. Tamsükaba Aieri jembia aser tenüngsang o

Management Committee nung tayonger W.K. Temjen Jamiri metetdaksü. Ano, tanü meshitetba au ki aser sentong asoshi raffle ka asayaba maparen Management Committee züngsem Wb. Imcha Longkümeri agia liasü.

Iba sentong tenzüka aser ki tasen meshiteta Indisen Baptist Arogo nung sannüker Rev. Dr. Temjen Ozükümi sarasadem aser DABA nung Mission Director Wb. Toshi Longkümeri sarasadema sentong shibang. Iba sentong AKTD lenir Wb. Tangit Jamiri ania liasü.

DMC kübok Cleanest Colony Award 2021 agütsüogo



DMC Administrator Albert Ezung, district administration ketdangsür aser Team Better Dimapur nungi züngsemtem tangokba noksa ka yangi angur.

Dimapur, Luchii/Dec. 17 (TYO): Colony tulu rongnung Ward-18 kübok Zelianrong Colony ajanga Cleanest Colony Award 2021 mezüngbuba jenjang ngutetogo aser Sematilla aser UNBA-B nati tanabuba aser tasembuba jenjang nguteta liasü.

Iba sempet ya Hokulbarnü Tourist Lodge nung Team Better Dimapur ajanga sentong ka ayongzükba agüja liasü.

Jana reja ketdangsüba, kilentzü aoba lenmang sadema lapokba, jana rongdokba, lokti metzü meshiba tesem anepalua ayuba, nüburtemi shilem agiba, sanitation committee mapa balala inyakba, arem aser ai mürekba, tobacco free zone, ki-o-jen yangluba aser bensaba ajanga gari lenmang aser nüburtem nem timtem magütsüba aser residential sanitation tax mapang shidak nung menokba amala nung ajemdaker iba sempet ya agüja liasü.

Nüburtem nem shilem agidaktsütsü nükjidong nung Dimapur Municipal Council (DMC) ajanga mürekmejuba nung toktepa sentong ya tenzü, koba agi lenmang ka kisüng nung mürekmejuba yimya temaba jenjangi ajungketba dang masü mürekmejuba, nüburtemi shilem

agiba aser lokti-i pei mapa ama angatetsü asoshi awareness agütsür, ta DMC Administrator, Albert Ezung-i iba sentong nung ashi.

Iba sentong ya tesüiba küm ishika kanga takok ngua agiyonga arur aser colony ajunga nung amai temelenshi tulu ajiteter. Terenlok mapa asoshi colony ketdangsür aser züngsemtemi shilem agiba atema pai pelaba lemsatepa liasü.

Langka tajung ajangzüktsü asoshi asenoki sorkar agency tem kisüng nem menungloksütsüla. Iba amala maparen nung nübur ajungai shilem agiba nüngdaker aser terenlok maparen balala atema lanurtem pei sasa angateta tejakleni aruba angudang tali ajungmesor, ta pai ashi.

Dimapur telungzük aser temeket nung temelenshi tajung bener arudaksüba atema SDCO (Civil) Dimapur, Zubenthung Ngullie-i DMC aser Team Better Dimapur dang pelaba lemsatepa liasü.

Nüburtemi shilem agiba ajanga dang süngjang atanger, ta pai ashi. Paisa nüburtem dang tarutsü anogotem nunga ajak lungjemer inyaksü aser DMC yaritsü ayongzükba liasü.

Colony tilatem rongnung Lakeview Colony-i mezüngbuba jenjang ngutet, Riverbelt Colony-i tanabuba jenjang aser Island Colony-i tasembuba jenjang nguteta liasü.

Mezüng jenjang nung takok angur nem kulizüng kaket den senpet sen lakh ka, tanabuba aser tasembuba jenjang nguteter nem senpet sen 50,000 aser 20,000 agüja liasü.

Kasa sentong nung quarterly award tema agüja liasü.

1st quarterly (January, February & March) mapang Colony tulutem rongnungi Duncan Bosti aser Colony tilatem rongnungi Sifty Colony shimteta liasü.

2nd quarterly (April, May & June) mapang Colony tulutem rongnungi Notun Bosti aser Colony tilatem rongnungi Aokong Colony liasü.

3rd quarterly (July, August & September) mapang Colony tulutem rongnungi Lengrijan aser Colony tilatem rongnungi Niu Colony liasü.

Maneni 4th quarterly (October, November & December) mapang Colony tulutem rongnungi Naga United aser Colony tilatem rongnungi Bank Colony ajanga takok ngua liasü.

Jubilee Park & Yimkong Sidewalk Management Committee

Ao Kaketshir Telongjem Dimapur

Raffle Result :

1st Prize - Sl.No. 253. 2nd Prize - Sl.No.161.
Consolation Prizes : Sl.No.282,258,288,99 & 49.
Iba raffle nung adokertemi sempet agizüktsü atema mobile number 7085062285 / 9612836269 / 8837358813 ajanga December 23, 2021 tashi nung tongteprateptsü mepishir.

NLA Session ter buba indang sentong yangluogo

Dimapur, Luchii/Dec. 17

Emergent Session ameba mapang jembitsü onüktem iba Committee ajanga asadanga liasü. Session mapang item Business ya alitsü: 1. Reporting on Assent to Bills 2. Introduction of Government Resolutions 3. Discussion, Consideration and Adoption of Government Resolutions 4. Unfinished Business, if any 5. Adjournment of the Session sine- die.

December 20, 2021 nü

RD Department pur jeli Khristmas sentong agi



Dimapur, Luchii/Dec. 17

(TYO): Department of Rural Development pur December 16, 2021 nü RD Conference Hall, Kohima nung jeli Khristmas benjong munga liasü.

Sentong nung Minister, RD, Metsubo Jamir-i Khristmas benjong salem lemsatepa mapang Yisu Khrista-i meimchir asoshi takum bendanga agütsüba kodanga mamadoktsü ayongzükba liasü.

"Yisu alimai arudang alima tammang tia nung liasü, saka Pai bendanga agütsüba yong tanü asenok ajak asen menen nungi alangzükba lir," ta pai ashi.

Iba Khristmas ya asenok ajak asoshi tetetzü tulu aketba lir, anungji COVID-19 tashidak wara mechi nisung jenti takum samaogo ta asenoki biletettsüla. Kibong aika nung mangyim tejashi lir aser ano Mon district kübok Oting nung lendong agi kibong aika dak kongshir lir, ta pai ashi.

Temoatsü jenti agütsüba aser külemi Yisu asoba benjong mungtettsüsa maongka agütsüba atema Jamir-i Tsüngrem nem tenüngsang agüja liasü.

Department adenshiba indang jembiba mapang

Commissioner & Secretary, RD, Neposo Theluo, IAS ajanga ashiba agi, iba ama adenshiba ya kanga tongtipang lir, kechiaser iba yagi sadok-sayima jembishinütsü maongka agütsür aser ibaji ajanga tesendaktep tajung yangertsü aser kibong ka ama bilettsü.

Iba ama adenshiba aser lungjemba ajanga asenok kisüng mapa inyaksü aruba masü ta angatetdaksür aser Tsüngrem den aser kati ka den tali lungjemshir, ta pai ashi.

Iba ama sentong tajung ayongzükba atema pai Director aser lar team ajunga nem tenüngsang agüja liasü.

Iba sentong nung Director, RD, Liboni Humtsoe-i "Mamatetba Khristmas" onük nungi jembia liasü.

Sentong nung Jt. Director, K. Neibou Sekhose menden liasü aser Addl. Director, Azenuo Pienyu-i sentong tembanga sarasadem.

Iba jeli Khristmas benjongmung nüngtem nem Orphanage Home pur atema tenla bendena liasü, Lucky tip, Khristmas temoatsü lemsaba, temeja ken atenba, Lai azüngba aser Khristmas chiyong chiyonga liasü.

Dimapur-Bokajan lenmang nung mejajai ataang: Dimapur Police

Dimapur, Luchii/Dec. 17

(TYO): District magistrate Karbi Anglong, Diphu, Assam ajanga Dudu Colony, Borjan Mouza nung aliba Lahorijan Block-03 nung December 20, 2021 nü Evection drive agitsü aliba mechi Dimapur-Bokajan Road nung jajaba melena Dimapur-Dillai Road nung

jajatsü totuyuba agütsür, ta Dimapur Police ajanga sangdong ka nung ashi.

Dimapur-Bokajan Road melena Dimapur-Dillai Road nung December 20, 2021 nü nungi tenzüka Evection maparen metembang tashi jaja atatsü metetdaksür, ta sangdong ajangasa ashi.

Karbi telungpur telok KDLF chairman khaset



Bokajan, December 17, 2021 (Agencies): Hokolbarnü Assam kübok Karbi Anglong district nung Karbi Democratic Liberation Front (KDLF) nung chairman Jackson Ronghang (27) khasetogo.

December 10 nü Rongmongve anasa apu yangludak nungi nisung ka pur aoba dak sendakba nung Jackson-i shilem agi ta tai tonglokja liasü.

Karbi Anglong police-i Jackson Ronghang aser nisung ana dak tai tongloksü aser parnok i pur aoba nisung

kümzüksü atema mapa tulu ka tenzüok.

December 13 nü Karbi Anglong Police-i pur aoba nisungji kümzüok saka Jackson Ronghang jena otet.

Iba sülen Karbi Anglong police-i Jackson Ronghang tsüingsü bushiyonga arudang Rongmongve nung aliba arem ka nung pa jenoka aliba bushitet.

Hokolbarne police-i iba tesem mita aodang KDLF telungpurtem den khatap.

Iba mapang Jackson dak injang agi khashi saka tangartem jena ao. Iba sülen pa

mozü kidang anir ao saka pa len tom nung süadok.

Police-i pa ket nungi pistol, injang aser taitüsü aketba kulikakettem ngutetogo.

Taküm küm tetenzüklen Jackson Ronghang-i anir KDLF telok tenteta lir. Parnok züngsem ishika lir aser tashiyim agi sen saruba mapa inyaker.

"Karbi Anglong aser Dima Hasao hill district tem nungi telungpur telok troki temai adoker sorkar den yimjung olemtep tenzüokba sülen Jackson-i telungpur telok tasen ka tentet" ta police ketdangsür kati ashi.

Adani Group-i Agartala Airport ketdangsütsü

Guwahati, December 14, 2021 (Agencies): Adani Enterprises Ltd-i 2022 nungi Agartala nung aliba Maharaja Bir Bikram Airport (MBB) ketdangsüa reprangtsü.

Taküm küm tetenzüklen Adani Group-i MIAL (Mumbai International Airport Ltd) nung shilem tulu ka alizükba sülen linük nung airport operator tulutiba kümogo.

Linük nung tayimtsü anendak maziungtiba rongnung tanabubaji Chhatrapati Shivaji Maharaj International Airport (CSMIA), Mumbai lir.

Adani group-i yakta Agartala

nung unified terminal building (NITB) ketdangsütsü ta osang ajanga ashi.

Parnoki PPP model inyakyim nung Maharaja Bir Bikram Airport (MBB) ketdangsütsü.

Airport Authority of India (AAI)-i Bhubaneswar, Varanasi, Amritsar, Trichy, Indore, Raipur, Calicut, Coimbatore, Nagpur, Patna, Madurai, Surat, Ranchi, Jodhpur, Chennai, Vijayawada, Vadodara, Bhopal, Tirupati, Hubli aser Imphal dena airport 25 tashi monetize asütsü meranger.

Myanmar-i PLA telungpur India ketnung agütsü

Imphal, December 17, 2021 (Agencies): Manipur nung telungpur telok People's Liberation Army (PLA) indang züngsem 5 tashi Myanmar-i India nem agütsüogo.

PLA telungpur 5 ji Indian Air Force (IAF) tayimtsü ka ajanga Bir Tikendrajit International Airport tonga anir aru, ta police-i ashi.

Par punguji Salam Somendro, Th Kalasana, Nongmaithem Narendra,

Taorem Rohen aer Loitongbam Rajkumar nunger ta jangjaogo.

Yaküm August ita Myanmar kübok Chindwin River Bridge anasa police-i PLA züngsem pungu ya apuba liasü.

Myanmar Army-i Northeast India telungpur teloktem anema Operation Sunrise inyakdang PLA züngsemtem apu.

Parnok ajak Manipur Police ketnung agütsüogo aser parnok i bushisüngdangtsü aser asüngdangyatsü.

Meghalaya nung infrastructure shitak maliba school aika lir: Conrad Sangma

Shillong, December 17, 2021 (Agencies): Meghalaya nung school aika nung infrastructure shitak mali ta chief minister Conrad Sangma-i ashi.

West Jaintia Hills district kübok Sawlyngdoh Higher Secondary School indang Golden Jubilee sentong nung Conrad Sangma-i iba osang metetdaksü.

Iba sentong nung Chief minister Conrad K. Sangma, education minister Lahkmen Rymbui, commerce and industry minister Snaiwbhalang Dhar aser MLA Nujorki Sungoh nungeri Sawlyngdoh Higher Secondary School tenzüksang Thomlin Suchiang

indang kürakyanglu ka sayatsü. "Kaketshir aika infrastructure shitak maliba school tem nung azünger" ta CM Conrad-i ashi.

"Ajisüaka, iba yagi onok tezü matanger saka tangatetba tajung nung education system melenshitsü alizüing yur tejakleni aotsü meranger" ta pai ashi.

State sorkari Meghalaya nung education system tajungba kümdaktsütsü meranger ta Conrad-isa ashi.

"2018 election nung onoki sorkar len anitsü asoshi nübortemi maongka agütsü aser onoki education system yanglushitsü atema temolung

agütsütsü" ta paisa ashi.

Küm shia state sorkari education atema Rs. 2000 crore shi endoker aser iba nung grants, salaries aser infrastructure projects dena lir, ta Meghalaya chief minister-isa ashi.

"Sen aika endokaka education sector nung tayongzüokba aika lir aser onoki itemji kokettsü meranger. Onoki education sector nung khurettem agizüker saka tajung tangatetba nung inyaka aoeer" ta paisa shisem.

Iba sentong nung Meghalaya chief minister Conrad-isa school souvenir sayatsü.



Hokolbarnü Assam Cricket Association (ACA) ex-secretary Pradeep Buragohain CJM Court, Guwahati-i anir aodang agiba noksa angur. Pradeep Buragohain inyakba mapang Rs 50 crores shi tim mesüi amshi ta ACA Chief Executive Officer Pritam Mahanta-i ken o benokba nung ajemdaker Pradeep apu. (Guwahati, December 17)

Assam sorkar ketdangsür ka süpokrem agiba atema apu

Guwahati, December 17, 2021 (Agencies): Assam sorkar nung revenue department ketdangsür kati süpokrem meshia agiba mapang apu.

Directorate of vigilance and anti-corruption ketdangsürtemi Debananda Bora apu.

Bora ya Hojai Revenue Circle office nung mapa inyaker

liasü aser pai süpokrem meshia agiba ken o ka benokogo.

"Lat Mondal Debananda Bora ta ser ketdangsür jati Hojai Revenue Circle office nung süpokrem meshia agidang apu. Iba dak sendakba nung ken o ka benokogo" ta Assam special DGP GP Singh-i metetdaksü.

Assam police-i Jorhat nung azü 24 kümzüok

Jorhat, December 17, 2021 (Agencies): Assam kübok Jorhat district nung police-i Brihostibar aonung azü 24 tashi kümzüokogo.

Nagaland-i shibelentsü aliba azütemji Jorhat district kübok Chaguri nung kümzüok.

Azütemji süngzü agi alener liasü aser kar bosta

nung aser kar azüki nung shibanga liasü.

Azü bena aliba nisungji Doku Doley ta jangjaogo.

"Police-i Jorhat nung 24 desi (local breed) azü 14 kümzüokogo. Azütemji ozüing alema Nagaland-i bener aotsüba liasü" ta Jorhat DSP Mamoni Hazarika-i ashi.



Agartala nung COVID-19 tenokdangba kar salaba sülen kaketshirtemi higher secondary board tatidang agütsüba angur. (Agartala, December 17)



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUCHII 18, 2021

Opposition Melongjemettsüa Akok

India ama democracy linük ka nungbo yimsüsüba menden ya senmangba menden ka masü, saka party kar nungbo party nung tongti mendenji kinüngertemi dang senmanga aruba menden ka ama kümogo. Tatishitsü agi, Congress Party nung Tir inyaka arurtem rongnung Jawarharlal Nehru; par jala Indira Gandhi; lar jabaso Rajiv Gandhi; pa kinüngtsü Sonia Gandhi; lar jabaso Rahul Gandhi nung Party Tir inyaka aruogo, aser parnok karbo kümsük (tenure) aiben inyaka aruogo. Ibaji ajanga Congress party Tir menden ya senmanga aruba menden ka ama aikati bilemer. Congress party asentenshitsü atema party lenirtema aikati telung nungbo bangdak lenirji Gandhi kibong nungi masü saka temsüa alir kar ang aginer. Ano külen 2024 küm India nung General Election agitsü lia BJP den madenba opposition party temi Front ka tenteter BJP anema longjemer tokteptsü atema jembishinü tenzükogo, saka opposition party tem junga melongjemettsü ama reprangteter, kechiyong party tem tsüngda tebilemba balala lir aser lenji maruteptsüa akok. Ano külen party kari BJP anema tokteptsü atema tongti party ji Congress sūdaksüner, aser karibo iba teloktep nungji Congress medendaktsüner, talisa Trinamool Congress (TMC) tongti lenir, Mamata Banerjee-i opposition Front nungji Congress maniokner aser lai Rahul Gandhi bo aiben aija arudar. Taküm küm tetenzüklen West Bengal Assembly election nung Mamata Banerjee-i aniba TMC-i takok tulu anguba sülen nungi tenzuka yimtenren tsütsü la nükjidong tuluba yuogo, ta aikati bilemer. Bengal assembly election nung BJP-i la anema sashia nokdak saka lai BJP madak takok tulu angu. 2024 küm General election agitsü lia tang lai party balala nungi lenirtem kibok nung ajurua opposition party tem longjemer Front ka tenteta BJP anema nokdaksü atema jembishinü tenzükogo, saka lai iba teloktep nungji Congress bo medendaktsüner. Atangji BJP anema tongti party ji maneni Congress sa asütsü süra party nung bangdak lenirji Gandhi kibong nungi masü saka tangar kar melentsü nungdak ta aikati bilemer. 2019 küm January ita nunga Mamata-i Kolkata nung opposition party 23 nungi lenirtem senden ka ayongzüka agi aser parnoki BJP tamakok ngudaktsütsü atema tenangzükba agia liasü. Mamata atema yimtenren nung tsükchir tulutibaji BJP lir, ajisüaka tarutsü nung la jenjang ajungtsü atema lai Congress anema asalentong yanglur inyaker. 2011 küm nungi 2021 küm tashi nung West Bengal nung Congress nung tongti lenir aika lar party nung denogo. Taküm kija nunga Meghalaya nung Congress MLA 17 nungi 12 bo TMC nung denogo, iba dak alia Tripura aser Goa densema state aika nung Congress lenirtem lar party nung adener. Tang apibo TMC jenjang junga kümdar, saka General election nung BJP anema tokteptsüa Mamata-i Congress mendeni opposition party sabang ka nung longjemettsü atema inyakbaji takok angutsü asü mangutsüar khen lir ang metettsü. BJP nung madenba opposition party temi Congress MP, Rahul Gandhi lenisüba kübok melongjemner ama reprangteter, aser ibaji ajanga BJP nem lenmang tesadamba lapoktsütsüa akok. 2019 küm General election nunga BJP anema opposition party tem longjemettsü atema jembia aru saka melongjemet aser 2024 küm General election nunga opposition longjemettsü atema jembia tenzükogo saka külen opposition tongti Congress tashi maitba den külemi party kari Rahul Gandhi lenisüba kübok opposition longjemettsü memelunger, anungji taruba election nunga opposition party tem ka kuma melongjemettsüa akok, ta bilemer.

OLEMSABANG

Mayimjem Atepzüng Wadang

Imliodang Aier

"Saka kodang Tanela Temeshi nenok dangi arudir nenoki ain agizüksü, aser Yirusalem nung, Yihuda aser Samaria ajonga nung aser alima tatem tonga, nenok kü kulitem asütsü." T.Mapa 1:8

Okila

Yisu Khristai Pa sülen anitakertem nem nungloksüba wadang tulutiba aser tongtipangtibaji alima nübur ajak dang Osangtajung kuli asütsüba ya lir. Tenyarterm Mapa kaket nung ashibaji na alidak aser atena or nai tongtetba alima tesem ajonga nung inyakang ta angateter. Saka Lai oren ajanga angatetbaji, na alidak nungi tenzüksüla aser iba nungi metenloka alima tatem tonga inyaksü ashi ta angateter. Tanü Ao lima tia reprangdangra asen Aori tenük lapoktsüba nüburtem (bendang limatem) dang nungi asenok shi aser tanela jenjang kanga tajemzükba nung aliba angur. Ao Arogotemi bendang Mission kanga meranga inyakang asen atepzüng tera senzuka toktsü asü ta bilemer. Yanglushidi Sensaksem Sapang (YSS) nung Home Mission tebilemstü benoka jembidang sapangpuri shisa lemsateba nung amendaker tang Arogotemi asen atepzüng nung tsüka rongga inyaksü mapa anguba tongtipang kar lemsateper.

1. Tebilemstütem

Ashiko, tanü Ao Arogotemi asen atepzüng nung mayimjemba wadang jenti alitsü akok saka teküboklen lemsaba wadang ana ya ano tang atema kanga tongtipang teniyaksü khuret ta ajiteta iba tebilemstü shisadangtsü lemsateper.

1.1. Migrant workers

Kodang migrant workers ta südir tatsütiba agi asenoki angatetsüji, asen Naga nung masürtem bendang lima nungi arua asen lima nung aener ka ama lia ayangertem (kisü-jensürtem, shishilembartem, mapa inyakerterm a.a). Tia maka tanü Ao Arogotemi item nüburtem den kulisüba nung anünga lir ama ajiteter. Hau, khensa kecha meinyaker ta ashir masü, saka ano tali inyakloksemtü lir ta ajitetba YSS nung lemsatepba ajanga tali jangjar.

1.1.1. Asen nübur tangatetba:

The Hindu:Business Line, June 22, 2014yamai zülua lir, "The issue of illegal migrants is no longer a humanitarian issue, but a security problem"... "The influx of illegal migrants has brought about a serious demographic change creating a sense of insecurity and apprehension amongst the indigenous people... due to the fact that our culture, tradition, political identity, social fabric and the land has become under severe duress in the hands of the illegal foreigners." Ibai 2014 küm sentong ka nung asen Minister kati jembiba o lir. Iba tangatetba nung asen lima lir. Migrant workers ajakbo illegal migrants masü saka aikasa ozüngi memelai arua alinung nübur teimba tangatetba joko yamaji kuma lir. Migrant worker-temji asen asoshi tetsübuttsü ang ka ama kümdaktsü nungji asenoki parnok asen lima nungji sadoka melie odaktsütsüang yongyar anungji parnok asen den lisemdang parnok den kulisütsü atema kangabo mejangrar aser temlung magütsür. Laishibai ashir, "Ner linük nung aliba aener dang mejungi tenbenshi. Ne den aliba aenerji nai senso pur ka ama benshiang. Na ama parnok danga meimang,..." (Levi 19:33-34). Arogotemi iba tesayuba nung temlung tera magütsü asü koda? Tetsükdaktsü kar ali asü merajem agi meinyaker? Sensopur ama aser pei ama meimang ta ashibaji koda? Ya tebilemdangtsü masü no!?

1.2. Mapa maka lanurtem

Asen lima nung lanur tajung jenti adoka tazüngba nung takok tulu ngua aser juri mapa balala inyakerterm(entrepreneurs) aika jenjang tajung nung nokdaka lir. Saka ano lanur tajung aika mapa kecha maka tsürabur dak dang medongloker kazürtem lir. Talisa Covid 19 pandemic ajanga lanur aika bendang lima nungi meyipba arua kazütepdar. Parnok ajak nembo government-i mapa magütsütettsü. Anungji, iba khuret ya joko Arogo asoshia tebilemstü tulu kümogo. Süra Arogoia kechi inyaktettsü? Asenoki bilemer, joko parnoki parnok sasa mapa meranga inyaksüba dak alaka tanga lemanng kecha mali. Süra mapaji kong lir? "Adianu mesüra adianutsür ka mangsa aser anogoshia chiyongtsü agi anünga lira, aser nenok rongnung kati parnok dang ya oda shira, 'Junga oang, lemlema aser tepok sünga liangma,' saka temang asoshi nungdak kecha parnok nem magütsüra, aji kechi tajangzük? (Yakob 2: 15-16). Joko arogoi parnok shi taküm jenjang atema lemanng karbo sayutsü mapang tongogo. Shi taküm manepalui tanela taküm anepaluba kisüng agi dangbo majungtsü.

2. Arogo Teinyaktsü

YSS nung sapangpuri shisa len sayutepba nungi tang Arogoi tejaklen lemsaba tebilemstü ana atema inyaktettsü takoktsü lemanng kar yamai:

2.1. Migrant workers den kulisüba

Mezüngbuba nung amangbapurtem ajak atema teinyaktsü tulutibaji, tatishitsü taküm liteta sayuba (lead by example). Asenoki tatishitsü taküm melitetba agi tzümar den mission mapa takok ngua meinyakteter. Lenir kati Dimapur lima nung ajangshiba ka. Tzümar kati pa dang yamai ashi, "Dimapur nung nenok locali mission mapa inyak nung tejang matangtsü" ano Mokokchung yimtiba nunga atalokba ka tenzükker kati yamai ashi, Arogo VBS mapang sannükkeri tanur ka dang Khristan kümner asü mekümner ta asüngdang, tanubosangi yamai langzü, "koriboli mon nai" kechiba ta asüngdang nung yamai langzü, "Khristan khan moto kaikena jakra koritaki". Tzümarterm asoshi asenokji tetsükdaktsü/temetsükdaktsü lung ama kümadoka lir, süra Arogoi inyakba nung tejang tangtima?, Amangbapuri bilemdangti!

Shidi süra Arogoi migrant worker-tem den inyaksüji tasak masü, kechiba süra parnok asen den arua lir asüanungji, melamelaa tongtettsüpurtem lir. Asen atepzüng nung asünung rongsen, mapang nübo aika indoktsü madoker (bendang mission den medemdangra). Medenser oshiooben yimya liru joko angateteba asünung parnok den kulisütsü temelaba akümer. Tang Arogoi item mamangbapur den inyaktettsü mapa kar yamai lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Haiti nung pua aliba tanüంగా missionary 12 prongla chiokogo



Haiti kübok Titanyen nung aliba Christian Aid Ministries headquarters noksa nung angur.

December 17, 2021: Ita ana tejaklen Haiti nung 400 Mawozo teloki Christian Aid Ministries nungi missionary 17 pua liasü; tamalen missionary 5 chiok aser tang tanüంగా missionary 12 chiokba osang sangdongba sülen Christian Aid Ministries-i Tsüngrem nem tenüంగా agütsüogo.

Christian Aid Ministries-i sangdong ka ajanga, "Onok sarasadem langzüba atema onoki Tsüngrem sentsüwangshidaktsür. Pua alir tanüంగా missionary 12 prongla chiokogo! Onoki meima aliba parnok 17 prongla kümzüka atema onok den külemi longjemer Tsüngrem nem tenüంగా agütsüdi. Tesüiba ita ana tashi nenoki maneni sarasademja aruba atema nenok dang pelar. Onoki ano maneni osangtsüsang metetdaktsütsü," ta lemsatep.

November ita 21 nü tama missionary ana chiok aser December 5 nüa missionary asem chiokba sülen tang tesüsa tanüంగా missionary 12 prongla chiokogo.

Tamalen 400 Mawozo telok nung tongti lenir, Wilson Joseph-i, parnok chioktsü atema missionary shia dollar sen million kaka agütsütsüla, ta

takhangba agüja liasü, ajisüaka parnok nem sen magütsüyonga chiokogo.

Missionary 17 rongnungji Canada nunger ka aser America nunger 16 lir.

Parnok chioktsü atema 400 Mawozo telok den Haiti ketangsertem aser US sorkartemi jembiba mapang nung Wilson Joseph-i social media ajanga missionary tem chioktsü atema parnok nisung shia dollar sen million kaka takhangba agüja liasü.

October ita tatemanglen Joseph-i, "Ni akhangba ama senji magütsüra America nunger tekolak shiaji injang kaka khaloktsütsü," ta amokmerena liasü.

Taoba ita osangbenertem den jembiba mapang U.S. National Security Advisor, Jake Sullivan-i, America nunger ajakji kümzüka kidangi anir arutsü atema US Tir, Joe Biden-i inyaktsü ta nangzüko, ta metetdakja liasü.

Haiti security forces osang ajanga ashiba agi, tanüంగా missionary temji December 16 anepdang 5:00 ako meta chiok, iba sülen Morne Cabrit kiyong nung alirtemi parnok ngua local police station kati anir otsü.

Parnok ajak medical check

up agi aser parnok aika kongra kümer liasü. Brihostibarnü coast guard tayimtsü ka ajanga parnok US-i ogo.

Ohio nung aliba Christian Aid Ministry nungi missionary temi Haiti nung lajartem anepaluba ki ka semdangba sülen parnok meyipa aoba mapang nung tanur aser tetsürtem densema parnok aika puer ao. Iba tatalokba sülen mission field director aser American Embassy na longjemer parnok kümzüksü atema inyaka arugo.

October 16 Khristan missionary tem jagi Croix des Bouquets area nung aliba orphanage home semdangba sülen gari nung Titanyen-i meyipa aoba mapang nung parnok apu.

Taküm July ita nung Haiti Tir, Jovenal Moïse tepsetba sülen iba linük nung loktiliba aser yimtenren nung makmakshishi tulu lir aser Haiti nungertemi US dang tensa tajungba akümtsü atema sepaitem yokang, ta akhanger.

Haiti Ato kilonser, Claude Joseph-i US dang sepaitem yokang ta mepishibaji US-i magizük saka US-i tensa asadangtsü atema dang security ketdangsertem yoktsü, ta langzüa liasü.

ANO GO ABEN TSÜNGREM DEN

Teyarir malir asoshi teyarir südi

"Saka kodang nai benjong ka ayongzükdir, sensakertem, tetsüంగా teka lemtartem aser nükpokertem jatepang; aser Tsüngremi na moatsütsü, kechiaser parnoki ne nem shia agütsütsü makok..."
Luke 14:13-14

Alu wadang nung noktakang züంగా aser tembartemi yangteper. Yangtepba nung kenü aseni yarir aser kenü asen teyari meyiba angur. Iba ama yimya tajung benshia alu mapa nung takok ngua aru. Ano kodang nisung kar nüంగాdak mesüra timtem mapang nung yarir, asenoki meimlai aliba mapang lenmang balala nungi item nisungtemi yarir.

Yaritepba rongnung tematiba jenjangji nisung nungi konang, tetushi mesüra meyiba angutsü meimlai yaritepba ya lir. Amitsür, lajalongchar, nükpoker, tsüంగాtsüklongtsür züba-züba sentoker aser mezüంగాshir. Saka sensakertem, tetsüంగా teka lemtartem, nükpokertem mamatoki yaritsüji Tsüngremi mulungba lir. Parnoki lepa meyaritettsü akok saka item mapa inyakba ajanga Tsüngrem pelar. Ashiko asenok benjong mayongzüksü akok saka asenoki item nisungtem mamai Tsüngrem temeim lemsatepdi.

SARASADEM:

Oba Tsüngrem shinga mebensai meimtsü aser yaritsü ni tashi meshir. Amen

Laishiba küm ka nung: Isaia 1-2, T.Ken 146, J. Adok 3

LATTER RAIN REVIVAL TELOKI SARASADEM TSÜ MANENI AYONGER (T KEN 89:1-2)

Anogo : 19/12/21 Mapang: 5 AM nungi tenzüka

Adianutem, Tsüంగాrem tenüంగా asangtsü pa koda tetemtsü Kibuba lir anungji arung Pa tsüంగాdang asenoki apudakdi aser maneni Pa sentsüwangshidaktsüdi. Aser asenok ajak külemi ano yamai sarasademdi.

1. Tashi tulu aketba wara tamajung saka iba tashi kanga dang ajema kümdagi anungji iba atema Tsüంగాrem tenüంగాsangdi.
2. Iba wara kenyongi samadoktsü sarasademdi.
3. Iba wara ajanga kija kibong aser lokti aika nung timtem adokdaktsüogo anungji parnok atema sarasademtsüdi.
4. Iba wara aser shirang tabu balala agi shirnok shiranga lir parnok atema sarasademdi.
5. Kecha timtem makai Khristmas amongtsü aser taküm tajung agi New year ajurutsü sarasademdi.
6. Mon district kübok Oting nung koba lending tamajung ka atalok iba tesem aser nüburtem tesüంగాep atema sarasademdi.
7. Asen lima nungi AFSPA agientsü atema koba mapa inyakdaki iba atema asenok ajaki kanga dang nendaka sarasademdi. Aser shirnoki ketdangtsüa inyaker parnok atema kangadang sarasademdi.
8. India nung lenirtem tangatetba melenshitsü atema sarasademdi.
9. Tsüంగాremi langzütsü ta amanga tenüంగాsang agüja sarasademdi.

Tayonger tenüంగా nung ;
Rev. Dr. L Kari Longchar
Rev C. Teyong Kichu

International Religious Freedom Ambassador Rashad Hussain shim



Rashad Hussain

December 17, 2021: International Religious Freedom nung Ambassador-at-Large menden atema Senate-i vote ajanga Rashad Hussain shimogo; US Foreign Policy-international religious freedom

ajungkettsütsü atema State Department nung tongtiji pa asütsü, ta International Christian Concern (ICC)-i metetdaktsü.

Taküm July ita nung US Tir, Joe Biden-i iba menden atema Hussain shima liasü. Donald

Trump US Tir asüba mapang nung Ambassador-at-Large ji Samuel Brownback liasü.

Brownback mapang nunga pai lokti tentet balala den meranga inyakba ajanga meimchir temeden aser religious freedom ajungketja liasü. Hussain ya Wyoming nung aso aser par tsüraburtemji Indian-American lir. Muslim nungertem rongnunggibo IRF Ambassador mezüంగాbubaji pa asütsü.

Tamalen Hussain ya National Security Council kübok Partnerships & Global Engagement nung Director inyaka liasü aser Obama US Tir inyakba mapang nunga Hussain-i alima nung Yihuda nunger sempaba anema inyakba den külemi Muslim nunger nütsüంగా timba aliba linüktem nung Khristantem densema

minorities kümzüka mapa aika nung reshikangshiba tebilemstü onük atema ni inyaktsü, talisa loktiliba nung Khristantem reshikangshiba anema ni inyaktsü," ta metetdaktsü.

Pa Ambassador shimba sülen Hussain-i alima tesem aika nung religious freedom jenjang tamajungba akümba lemsatep. "Alima nung nütsüంగా shilem 80 bo religious freedom junga maliba mesüra jenjang kanga mejungi aliba tesemtem nung alir," ta pai metetdaktsü.

"Tang tashi alima nung tamangba yimsü nung ajemdaker nisung apuba, reshikangshiba, bendanga züంగాshiba aser tepsetba kanga bulua ataloker. Yihuda nunger sempaba, Khristantem reshikangshiba aser Muslim nunger sempaba densema taremzüktep maliba tatalokba jenti lir," ta paisa metetdaktsü.

Ambassador shimba sülen Hussain-i, "Alima tesem balala

reshikangshiba tebilemstü onük atema ni inyaktsü, talisa loktiliba nung Khristantem reshikangshiba anema ni inyaktsü," ta metetdaktsü.

ICC nung Director of Advocacy, Matias Perttula-i, "Iba ya ajanga religious freedom tejakleni aotsü. International Religious Freedom Ambassador Hussain shimbaji ICC-i pelaa agizüker. Hussain-i alima tesem balala nung reshikangshi anema junga inyaka aruogo. Onoki maneni alima nung religious freedom ajungkettsütsü atema US ajungshitsü aser alima tesem balala nung Arogo reshikangshiba anema inyakba onüktem atema Ambassador Hussain den külemi inyaksemtü yongyaa atar," ta metetdaktsü.

(Maneni tapak 9 nung...)

OLONG PAITEP # 6030


1				2				3		4
5		6								
							7			
8										
										9
		10				11				
				12				13		
14										
						15				
16										

- | | | | |
|------------------------------|-------|-------------------------|-------|
| TIPIEN | | LANGTSÜNGLEN | |
| 2. Auo nung chiyongsü asenba | - (7) | 1. Lenmang | - (7) |
| 5. Mangyimba mapang | - (5) | 2. Aor kidong ka tenüng | - (6) |
| 7. O tamendakdak | - (4) | 3. Tenarong maten | - (6) |
| 8. Pei dak malangba | - (7) | 4. A _ _ _ g | - (3) |
| 10. Juli | - (7) | 6. Mopung apodoka | - (3) |
| 12. Sen ayudak | - (7) | ola adokdaksüba | - (3) |
| 14. Tenük agi ajitet | - (4) | 9. Tongtipang tagitsü | - (7) |
| 15. Tamajung aküm | - (5) | 10. Menungra bilem | - (6) |
| 16. Apuso | - (7) | 11. Aiür | - (6) |
| | | 13. S _ _ _ k | - (3) |
| | | 14. T _ _ _ r | - (3) |

OLONG PAITEP # 6029 TELANGZÜBA

- | | |
|-----------------------------------|---|
| TIPIEN : | LANGTSÜNGLEN : |
| 1. Yiar, 3. Tesola, 7. Yimra, | 1. Yimti, 2. Amen, 4. Shiner, 5. Alaka, |
| 8. Tangar, 9. Peria, 10. Tanur, | 6. Satan, 9. Putet, 10. Tembar, |
| 11. Tasen, 13. Lemjem, 15. Tambu, | 11. Tatok, 12. Amang, 14. Jala. |
| 16. Khuret, 17. Sang. | |

Noksa nung meputepi aliba 10 bushiang



TANÜBO NAI LANGZÜANG

Q. 'Commercial Space Astronaut Wings program' ya koba linük den sendaktepa lir?

[A] USA [B] China
[C] Russia [D] Australia

(Taruba adok nung onoki langzüsü)

YASHI ADOK TELANGZÜBA: Telangana

AO OSHI ANGAZÜKDAK:

TANÜ ANGAZÜKTSÜBA OJANG

Litsü
(n) ali telemsa, artsü kübok (within boundary)
* Asenok litsü nung arem shiruru aika lir.

Litsüng
(v) alu achidang aurong aser süngdong tulu wazüka yutsüba (preserve bamboo and matured trees during jhum cutting)
* Aluyimba nung litsüng inyakyim yagi rongsen kümzüker.

NAI-A YA METETTER MA

- Alima Nung Takatiba Company Kar: 2021**
- Apple Inc - 2.4 Trillion USD
- Industry: Electronics, Information Technology
- Product: Mobile, iPod, Personal computers, and tablets
 - Microsoft - 2.14 Trillion USD
- Industry: Software Development, Information technology, Consumer electronics.
- Products: Windows Operating System, Microsoft Office, Xbox, Search engine.
 - Saudi Aramco - 1.86 Trillion USD
- Industry: Oil and gas production, refining.
- Products: Crude Oil, Natural Gas, and petrochemical derivatives.
 - Alphabet - 1.8 Trillion USD
- Industry: Internet, Software services.
- Products: Operating System, Search Engine, Mobile Phone
 - Amazon - 1.68 Trillion USD
- Industry: Retail business, E-Commerce, Artificial Intelligence.
- Products: Software, Kindle, FireTV, Echo

SUDOKU # 6070 **TELANGZÜBA # 6069**

			3		5		9		2	5	8	4	3	7	6	1	9
	2								1	7	4	8	6	9	3	5	2
		1			8		4		9	3	6	2	1	5	7	4	8
7								9	4	9	2	6	5	8	1	7	3
3				5	7				5	1	7	3	9	2	4	8	6
	5			9	4		2		6	8	3	1	7	4	2	9	5
5	4	9					1	3	8	6	5	7	2	1	9	3	4
		3	2	1					7	2	9	5	4	3	8	6	1
		6		4					3	4	1	9	8	6	5	2	7

OJANG LUTEP # 5616

ASMIH	:	<input type="checkbox"/>															
NAGD	:	<input type="checkbox"/>															
GONIY	:	<input type="checkbox"/>															
PIE	:	<input type="checkbox"/>															
TTEIKSNYAÜ	:	<input type="checkbox"/>															
MAAP	:	<input type="checkbox"/>															
AAABLL	:	<input type="checkbox"/>															
EETTTMA	:	<input type="checkbox"/>															
IDNAYAKOK	:	<input type="checkbox"/>															
TGJAAUNB	:	<input type="checkbox"/>															

OJANG LUTEP TELANGZÜBA # 5615

OCHI SÜSHIA MESÜRA TIYAZÜ MAPAREN
AJAK KENÜ ANOGOBO JUNGKAI ADOKTSÜ

TAN HOPTA ATEMA - KOMA SÜLA ?

Q. Nagaland nung India sepaitem ya melidaktsü nunga koma süla ?



December 17, 2021 nü Bhopal nung Madhya Pradesh Chief Minister, Shivraj Singh-i Group Captain Varun Singh asüpila sentong nung asür nem akhüm agütsüba noksa nung angur.

Bangladesh rongsenkettsüng ainba nung India-i yaritsü: Ram Nath Kovind

Dhaka/New Delhi, December 17 (Agencies): Bangladesh-i par linük rongsenkettsüng jenjang aintsü aser azükarutsü atema inyakba maparen ajak nung India-i yaritsü, ta Hokolbarnü India Tir, Ram Nath Kovind-i metetdaksü.

Bangladesh yimtiba, Dhaka nung India nung den jembidang Ram Nath Kovind-i akhidang nungi India aser Bangladesh na tsüngda tesendaktep junga aliba lemsatep.

Bangladesh Tir, M Abdul Hamid-i jaokba nung ajemdaker Bodhbarnü Ram Nath Kovind

Bangladesh tonga ao, aser pai iba linük anogo asemnü semdang Delhi-i meyipa aruogo. 1971 küm Liberation War nung takok ngua Pakistan nungi Bangladesh nüchiso anguba sülen taküm küm 50 ajungba Golden Jubilee mong nung adentsü atema India Tir jaoka liasü.

Kovind-i, "India nung melungjang nung Bangladesh atema tesem tajung ka lir. Oshi aser sobaliba nung ajemdaker asenok akhidang nungi tesendaktep junga lir. Linük ana nungi lenirtem ajanga tesendaktep junga aküm," ta metetdaksü.

Bangladesh pusema Kovind-i, "Bangladesh-i par linük rongsenkettsüng tashi aittsü atema inyakba nung India-i yaritsü aser azükaru lenmang nung jajadang nenok den külemi inyaksemsü," ta metetdaksü.

Paisa, region nung linük ainba aser renlokba tsütsü Bangladesh ya tatishitsü tajung sayur ka kümndar, aser Bangladesh nung atema raraba ya nükjidong ka atema liasü, ta alima dang kuli sayutetogo, ta metetdaksü.

Liberation War sülen loktiliba aser rongsenkettsüng tsütsü Bangladesh nung temelenshi kanga adokogo, talisa Ato kilonser, Sheikh Hasina lenisüba kübok kanga melenshiogo, ta pai ashi.

Taküm November ita nung UN General Assembly-i Bangladesh, Lao People's Democratic Republic aser Nepal linüktem kanga terenlok maliba linüktem category nungi anitetba bangzüng ka renema liasü.

Kovind-isa linük anaprongla nung shishilembartem dang linük ana tsüngda shishilembaba jenjang ajungkettsütsü atema maangka bushia inyaksü, talisa Bangladesh aser India nung North Eastern Region tsüngda shishilembaba jenjang ajungkettsütsü mepishi.

"Alima tesem ajungalen India sensotem kümzüka alitsü aser junga alitsü atema India sorkari inyaker. Tesüiba küm ka ser tesadang tsüngda coronavirus wara mapang nung linük tesem balala nungi India sensotem anir arutsü atema sorkari meranga inyakogo," ta pai metetdaksü.

'Vande Bharat Mission' maparen aser timtem nung alirtem kümzüka maparen nung tongti shilem agia inyakerji

Dhaka nung aliba Indian High Commission liasü, ta paisa metetdaksü.

"Asenoki India nung 'Azadi Ka Amrit Mahotsav' amongba mapang nung ni yangi (Bangladesh) aliba India sensotem danga linük yangerba nung shilem tajung agitsü atema ajungshir," ta pai Bangladesh nung alir India nungertem ayongzüik.

1971 küm Liberation war ya 1971 küm March 25 ayaterm nung taoba mapang East Pakistan nung Pakistan nung sepaitemi tenzüik aser December 16 nü iba war tembanga liasü. Kasa küm nungjisa Pakistan-i iba rara nung tamakok angu aser Dhaka nung India nung sepaitem matsüngdang 'surrender' süa liasü.

Ita 9 tashi rara nung nisung million 3 dak tema asü.

Minister of State for Education, Dr. Subhas Sarkar aser Member of Parliament Rajdeep Roy nati Kovind meina Bangladesh-i ao.

Coronavirus wara prokba sülenbo tang mezüng Tir, Kovind-i Bangladesh semdang, aser iba ya linük ana tesendaktep tsütsü tetezü tuluka lir, ta tamalen Foreign Secretary, Harsh Vardhan Shringla-i metetdakja liasü.

Kovind-isa Bangladesh Ato kilonser, Sheikh Hasina aser foreign minister, AK Abdul Momen na den-a senden menogo aser Savar nung National Martyrs Memorial nung taküm tenla agüja asür sepaitem nem akhüm agütsü.

India nung nisung 101 dak Omicron variant putetogo: Centre

New Delhi, Luchii/ December 17 (Agencies): India nung nisung 101 dak coronavirus Omicron variant putetogo, ta Hokolbarnü Union health ministry-i metetdaksü.

Health ministry-isa, tang India kübok state 11 nung Omicron variant putetogo, ta metetdaksü.

Coronavirus agi tamajungba kongshiba state- Maharashtra nung nisung 32 dak Omicron putet. Iba dak alia Karnataka, Gujarat, Kerala, Tamil Nadu, West Bengal aser Andhra Pradesh state tem nunga iba variant putetogo.

Iba dak sendakba nung Health ministry-i nüburtem dang nüngdak tulu melira ainlen mesenzütsü mesüra lokti tulu madenshitsü mepishia metetdaksü.

"Benjung mongpu nung kanga longsolongpen masütsüji kanga tongtibang," ta ICMR tongti, Balram Bhargava-i osangbenertem nem metetdaksü.

Health ministry nung secretary, Lav Agarwal-ia, Omicron variant ya Delta variant dang nungi tekaraba proker, ta metetdaksü.

WHO osang nung ajemdaker Agarwal-i, "Omicron yagi Delta variant ajatetsüia akok, kechiyong iba variant ya tekaraba proker," ta metetdaksü.

Ano tanga osang ka nung, India nung ano nisung 7,447 dak coronavirus putet aser iba tashidak agi shiranger 391 süogo, ta Union health ministry-i metetdaksü.

Tang tashi nung India nung coronavirus agi shiranger 4,76,869 süogo aser tang teshirangdakpur

86,415 dang kümogo, ta Health Ministry-isa metetdaksü.

Linük nung iba tashidak agi shiranger ajak senteper 3,41,62,765 anepogo aser vaccine dose ajak senteper crore 135.99 dak tema agütsüogo.



December 17, 2021 nü Varanasi nung Uttar Pradesh Chief Minister, Yogi Adityanath-i All India Mayors Conference nung jembidang tangokba noksa nung angur. Iba conference ya Ato kilonser, Narendra Modi-i video conferencing ajanga tenzüikja liasü.

India nung Literacy Index temaba jenjang nung West Bengal lir

Kolkata, December 17 (Agencies): Foundational Literacy & Numeracy Index temaba jenjang nung West Bengal lir, aser iba dak sendakba nung West Bengal

Chief Minister, Mamata Banerjee-i state nung tesayurtem, tsüraburtem aser education department nung ketdangsertem nem tenüngsang agütsüogo.

Hokolbarnü twitter ajanga Mamata Banerjee-i iba osang lemsatepba den külemi osangakaket nung adokba report ka lemsatep.

Trinamool Congress (TMC) tongti lenir, Mamata-i twitter ajanga, "West Bengal atema osang tajung! State tulutem rongnungi 'Foundational Literacy and Numeracy Index' nung asenoki temaba jenjang

nguogo. Iba takok tulu anguba atema ni tesayurtem, tsüraburtem aser Education Department nem tetushi agütsür," ta metetdaksü.

State tulutem rongnung iba Index (Index on Foundational Literacy and Numeracy) temaba jenjang West Bengal-i angu aser tekübokba jenjang Bihar liasü. Iba Index ranking ya arrshi küm 10 ser tekübok tanurtem nem shisaliok agütsüba lenla nungi asadang.

Iba Index nung telemsa (category) pezü liasü aser itemji - state tulutem, state tilatem, union territories aser North east region lir.

Iba report ya Institute for Competitiveness-i renem aser Economic Advisory Council to the Prime Minister chairman, Bibek Debroy-i sangdonga liasü.



December 17, 2021 nü France defense minister, Florence Parly New Delhi tonga aruba sülen sepaitemi la nem akhüm agütsüba noksa nung angur.

Philippines nung Typhoon Rai agi yimtsüng jenti raksatsü



Central Philippines nung Cebu province kübok Talisay tesem nung Typhoon Rai agi ki raksatsür ayong nung tzu timba yima aliba anasa nisung ka nokdaka aliba angur. Typhoon tesashi ya ajanga tzümetsüng adoka yimtsüng aika mubang aser nüburtem kilem nung taolen mali, süngdong laodaktsü aser nisung 300,000 dak tema danga leni jena ao.

Manila, Luchii/Dec. 17 (Agencies): Taküm Philippines nung typhoon tesashitiba agi kongshiba ajanga teraksa agütsüba ketdangsürtemi asadangtsü merangba nung tetsükdaktsür ajurur, aser iba yipru ajanga süngdong-lidong laodakja, powerline tem raksaja aser yimtsüng aser jila tem mubangba nung nisung aika asüba osang lir.

Central Philippines kübok Negros Occidental nung Hokulbarnü nisung pezü asüba jangjaogo, anüdoklen Surigao del Norte province, south tsütsü Bukidnon aser tiyonglen Western Visayas nunga nisung asem asüba osang lir.

Southern Philippines nung kongshiba typhoon tem rongnung Typhoon Rai ya tesashitiba lir aser iba yipru yagi ki petsatsü, yimtsüngtem menüngsa aser yimti aika tzu agi mubang, ta International Federation of Red Cross ajanga ashi.

Iba yipru yagi nisung 140,000 dak tema amshio go aser Cagayan de Oro, Bohol aser Kabankalan yimtittem densema tesem aika tzu agi mubanga alidak emergency worker temi nüburtem kumzüksü arüsangteper, ta iba tentet yagi ashi.

Negros Occidental province nung nisung pezü tepsetba rongnung arishi küm 64 tain tetsür ka densema lir, shiba San Carlos jila nung lar kidang süngdong ka aloa la yangji zükset, ta Rappler news website ajanga ashi.

Iba yipru yagi mozüki ka nung emergency triage centre ka raksatsü aser Kabankala City nung coastguard aser police temi nüburtem kumzüksü meranger, kong anasa aliba Ilog ayong nungi tzu muteta adoka ajungketa yanglua aliba ki-o-jen nunga kongshir, ta Negros Occidental indang governor Eugenio Jose "Bong" Lacson-i ashi.

Western Visayas kübok Iloilo yimti nung tetsür ka yipru agi süngkum tebong ka onzüker arua nenset, ta Mayor Jerry

Trenas-i osangbener dang ashi. "Kü takum nung iba ama mopung sashia aonba ni kodanga majangshi aser onok dak indang indanga onshiba masü. Tzükum nung aliba yimti nung power mali aser cellphone tem signal mali," ta pai ashi.

Iba yipru dang ya yangji alirtemi Typhoon Odette ta ajar aser Brehostibarnü Siargao asetkong nung Brehostibarnü kongshidang mopung ya ghonda ka nung kilometre 195 (mile 120) tashi ona liasü.

Hokulbarnü tashinung mopung ya ghonda ka nung kilometre 155 tashi ona liasü aser yipru ya anüolen tsütsü Palawan province leni ao. Iba yipru ya Deobarnü South China Sea nung adoktsü imlar.

Brehostibarnü iba yipru ya Pacific Ocean ajanga aruba mapang nisung 300,000 dak tema ajungbena yangluba tejenokdak bushia liasü, ta osang ajanga ashi. Nisung 18,000 shi ano kidangi meshilang, ta ashi.

Surigao del Norte province kübok kangasa sashia kongshiba Surigao yimti nung nisung ka dak jana agi arua kongshiba sülen asü, ta osang ka ajanga ashi, kong ki-o-jen tem aika raksaba osang lir.

Surigao bushia aoba lenmang tem anentsüh, süngdong laoba aser power poles tem agi zükbanga lir, ta osangbener kati ashi.

Brehostibarnü Typhoon Rai yagi yimti nung nisung 170,000 shi ghonda ishika kanga timtemdaktsüogo aser ki-o-jen sashia raksatsü, ta Surigao City mayor, Ernesto Matugas-i ashi.

"Mopung kanga sashia aon. Ajak raksatsü - kilem onzüker ao, anentsüh agi lenmangtem nembang," ta Matugas-i ashi.

Teraksa ya tebang agi rasaa meshiteter, ta Bohol province nungi arishi küm 37 tain Joel Darunday-i osangbener dang ashi.

Ayong anasa aliba Loboc jila nung tzümetsüng adoka nisung aika kilem nung ananü buba taolen mali sabanger lir, ta Bohol indang governor-i yangji aliba

radio station ka nung ashi.

"Tangya kibong noklang aika taolen mali kilem nung sabanga lir. Parnok ya aonung sangwa tzünglu ajar aser mopung agi aoner. Teyari agütsür nüngdaker. Tang atema tongtipangtibaji takum kumzüksüba ya lir," ta Arthur Yap-i DZBB radio dang ashi.

Kanga sashia kongshiba province kübok danga jila tem nung kechi ataloka aliar ashitsü makok, kong electricity mali, ta Yap-i ashi.

Bohol northwest tsütsü Cebu province kübok Lapu-Lapu yimti nung lenmang anasa yipru agi ki matsüka kumdaktsür aliba aser yimtung sünga yinjong aser süng kongsang agi zükbanga aliba noksa nguogo.

Typhoon season tatemlen Rai yagi Philippines nung kongshir, kong cyclone timba July aser October ita arur.

Nisung meimchir mapa agi alima tatsükba kumdaktsüba ajanga typhoon tem tekeraba nung tali tashi taitba akumer ta scientist temi mapang talangka nungi tekumdangtsü shia arur.

Super typhoon ya United States nung category five hurricane den sako lir.

Alima nung iba ama tashi tulu yipru ya küm ka nung pungoben ajangshir.

Iraq tzümetsüng lendong nung nisung ter jungnüa asü

Erbil, Luchii/Dec. 17 (Agencies): Iraq north tsütsü semi-autonomous Kurdish region indang yimtiba, Erbil nung tzünglu kanga sashia aruba ajanga tzümetsüng adoka nisung ti asü aser aika yiru, ta ketdangsürtemi ashi.

Yasüng tzümetsüng agi nisung aliba tesem aika metsüngbanga lendong nung asürtem rongnung tetsür aser tanurtem dena lir, ta Provincial Governor Omid Khoshnaw-i Hokulbarnü ashi.

"Tzümetsüng ajanga rongsen jenti laluogo," ta pai sangdong ka nung ashi. Nisung tenet tzümetsüng agi asü aser ka tsüngi agi yaset, ta Khoshnaw-i Rudaw osangkaket dang ashi.

Iba lendong nung ano nisung jenti yiru aser iba lendong nung asü-amaba aser ki-o-jen raksatsüba tang tashi asadanger.

Nisung aika pei ki yutsür aotsüsa akum, ta civil defence indang odongtar Sarkawt Karach-i ashi. Samar alirtem bushiba mapang lir aser asü-amar tali asütsü akok, ta pai ashi.

Erbil nung lenmangtem nung

molushi yima liasü, ta osang ajanga ashir. Tzümetsüng agi bus, trucks aser tanker tem nungzüka bener ao aser tesem balala nung nungtena liasü.

Khoshnaw-i nüburtem dang tongtipang nüngdak ka mesüra kimai madoktsü ashi aser tzünglu ano maneni arua tzümetsüng tali adoktsü akok, ta ashi.

Iraq nung iba ama tzüingsang mopung tesashi yangi mapang shia kongshia arur. Iba linük nung kanga atsükba aser tzüingsarusa ajangshia arur, saka mapang ka-ka tzümetsünga adoker.

Ali taking den arem samar aliba ajanga tzu kanga kera telungi matsüokteter, aser yipru arudang ajungben tzümetsüng adoker.

Tzü-mopung melenba ajanga tzüingsang mopung tamajungba akumer, aser iba yongji tzüingsarusa aser tzünglu tesashi ya arur, ta scientist temi ashir.

Tzünglu ajema aruba den tzu-mopung melentepba ajanga rara agi raksatsür aliba Iraq nung loktiliba aser rongsenketzung nung kanga mejungi kongshitsü, ta mongintemi ashir.

Japan kitsük-kirong lendong nung nisung 27 asü

Osaka, Luchii/Dec. 17 (Agencies): Japan kübok Osaka yimti nung ki ka nung mi adoka nisung 27 shi süogo, ta ashir. Iba lendong ya asaa inyakba asü masü ta police temi bushisüngdangba mapang lir, ta public broadcaster NHK ajanga ashi.

Asürtem ya temolungjang aser tepokpok nung timtem adokba sülen asü, ta osang ajanga ashi. Iba ki floor pezübuba nung mi adokba firefighter ter dak tema arua remsepba sülen kijiba rongsar aliba noksa nung nguogo.

Asürtem ya ajak floor pezübuba nung aliba psychiatric clinic ka nungi liasü, ta osang ajanga ashir, koba kanga mazüngi aliba shishilempadak aser entertainment district ka nung liasü. Hokulbarnep 10:00 ako (par mapang) sülen emergency services nem osang agüja liasü.

"Mokozi tanak kanga adoka

liasü aser tezükne kanga mejungi menem," ta tenük kuli alir kati NHK dang ashi. Iba kidang nungi tetsür kati teyari meshia ayimtena angu, ta nisung kati ashi.

"Ni kimalen nungi reprangzüka yokdang floor pezübuba indang window nungi mi adoka liasü. Floor trok buba nungi tetsür kati teyari meshia teka ayiptena liasü," ta lai Kyodo News ajanga ashi. Nisung kar apu amshia kumzüka liasü.

Mi ya ghonda ka majungdang remseptet, saka tesem 20 sq m (215 sq ft) rongdoka liasü, ta yangji aliba fire department ajanga ashi.

Iba ki nung danga floor aser anasa aliba ki nungbo teraksaba meliasü, ta osang ajanga ashi.

World War II sülen Japan nung nisung timtiba asübaji taoba küm liasü. 2019 küm Kyoto nung aliba film studio nung nisung kati mi senlokja nisung 36 takum samaja liasü.



Sorkari budgetary law benoktsü sentong yangluba anema lokti tentet balalai linük tesem ajungalen longkak aittsü ayongzükba ama Rome indang central Piazza del Popolo nung nisung meyririjang aika adenshia aliba noksa nung angur.

50th WEDDING ANNIVERSARY18th December 1971 - 2021

Mr. Imnatemjen Jamir &
Mrs. Imzachetla Tzüdir

"Jokorla, tangbo tamang, teimla, temeim, item asem teti lir, aser item rongnung, temeim tulutiba".

Temeim chirnur, anükapang aser semchirtem

Mon DPDB senden agiogo

Mon, Luchii/December 17, 2021 (TYO): Hokolbarnü, District Planning & Development Board Mon-i Deputy Commissioner Conference Hall nung ita shia ayonga agiba DPDB senden agiogo. Iba senden nung DC Mon, Thavaseelan K IAS menden liasü, ta sangdong ajanga metetdaksü.

Iba senden tenzuka, tai makar nisung 14, shirnok December 04 aser 05, 2021 nü

Oting aser Mon Town nung lendong atalokba mapang taküm sama, iba lendong nung asürtem bilemtetta teloki minute 5 süngjema mokremer akhüm agütsü.

Iba sülen, Chen Town nung Fienau Welfare Society register asütsü atema asalentongtem teloki agizuka liasü aser telok tebilemba mapa kuma inyaksü asoshi tim tekolakpur dangi tezüluba nung agütsüogo, ta kasa sangdong nung shia lir.

Zunheboto nung DLCC senden amen

Zunheboto, Luchii/December 17, 2021 (TYO): Hokolbarnü, Deputy Commissioner'er kidang Zunheboto District Level Co-ordination Committee (3rd quarterly) senden mena liasü, ta sangdong ajanga metetdaksü.

Iba senden agiba mapang, DC ajanga Natha Old aser Lizu Naghuto yimtsüing nem tobacco

free certificate agütsü aser Sunbeam School nem 'tobacco free school certificate' agüja liasü.

Iba senden nung, District Nodal Officer (NTCP) Dr. Easter Chophy Ngullie meden liasü aser Deputy Commissioner Zunheboto, Peter Lichamo-i o jembia, ta kasa sangdong nung shia lir.

Pink Floyd-i 'P.U.L.S.E. Restored & Re-Edited' sayatsü

Luchii/December 17, 2021 (Agencies): Nüingtugu Rock band, Pink Floyd-i band meyong concert film - 'P.U.L.S.E.' indang 'restored version' ka sayatsü terenemba lir.

1995 küm May ita, iba band-i kensep ka ama 'P.U.L.S.E.' sayar sülen küm 27 lir, sangküm February 18 nü band-i Blu-ray nung mezüing 'P.U.L.S.E. Restored & Re-Edited' sayatsü terenemba lir.

Iba version tasenba nung, 1995 küm original CD nung sayaba ama yimya kasa nung sayatsü.

'P.U.L.S.E.' concert film ya David Mallet-i direct süogo aser version tasenba ya Blu-ray ana aser DVD deluxe box set ana nung angutsü.

Iba concert indang video footage ya Aubrey Powell/Hipgnosis ajanga tanaben edit süa yangluogo aser iba cover design, koba 2006 DVD atema

Storm aser Peter Curzon ajanga mezüing design süa liasü, iba cover ya Aubrey Powell/Hipgnosis (photography) aser Rupert Truman/StormStudios ajanga yanglushiogo.

Iba deluxe package nung music video, concert screen film, documentary, 'Pulse Tour' rehearsal footage tem aser tanga den 60-page booklet ka angutsü imlar.

1995 küm October 20 nü London indang Earls Court nung Pink Floyd's 'Division Bell Tour' indang European Leg nung recording ka yanglur sülen, 1995 küm band-i 'P.U.L.S.E.' ya kensep ka ama saya liasü. Tang, band-i iba kensep ya version balaka nung sayatsü renemdar.


Iba concert nung, Pink Floyd-i ken talisa 'High Hopes', 'Wish You Were Here', 'Comfortably Numb', 'Keep Talking', 'The Great Gig In The Sky' aser 'Sorrow' tenogo.

Rev.Dr.K.Imo Aier indang film ka saya

Dimapur, Dec.17 (TYO) : Khristar walunir Rev.Dr.Imo Aieri India nungi America tashi nung ABAM, CBCNEI aser Board of International Ministry ajanga America tashi nung akümüli tepiyong Tsüngrem mapa inyaka jajaba taküm otsü 'documentary film' ka tanü Hokolbar nü Dimapur nung Nagaland Mission Movement (NMM) kidang Nagaland Baptist Church Council (NBCC) nung tongti zülur Rev.Dr.Zelhou Keyhoi sayatsüogo.

Iba film ya Baptist International Mission (BIM) teyari agia Highland Dawn Media teloki 2019 küm nungi Dimapur, Impur, West Bengal, Bihar aser Orissa limatem tashi tsüngdong oagi noksa tangoka yangluba film ka lir.

Iba film sayatsüba sentong nung jembidang," Rev.Dr.Imo Aier ya India nung dang masü saka alimai metetba temulung lemtet Tsüngrem tenzükera ka lir. Asenoki aiben nisungi inyakba mapatem sür külenang jembia tushir, saka yamai nisung taküm lia pelatepsüsa aser temoatsü angutsüsa inyakba ya mapa shitak aser



NBCC tongti zülur Rev.Dr.Z.Keyhoi Rev.Dr.K.Imo Aier documentary film sayatsüba mapang jembiba noksa nung angur. (Dimapur, December 17,2021).

tajung ka lir," ta USA nung BIM missionary Rev.Dr.Keyhoisa metetdaksü.

Iba kasa sentong nung Rev.Dr.Imoi pai ajangshiba otsü kar lemsatepdang, " pai Tsüngrem tenzükba mapa yabo tanüla anir arutsüba aser arogo tasen tenzükuyonga aotsüba mapa masü saka arogo tem tanüla nung aser rongsen nung tashi itshidaksütsü asoshi inyaksü lemtzüksüba mapa ka liasü," ta metetdaksü. Rev.Dr.K.Imo Aier ya CBCNEI nung tongti zülur aser

East India nung asoshi inyaksü lemtzüksü. Ano, BIM teloki pa dak temulung lemtetba kuli kaji, India nung American Baptist Foreign Mission Society meyong kiojen aser ali rongsen ajak madak kibur kuma repranga ketdangsütsü tashi agütsür inyakdakja liasü.

Tanü sayaba film ya English oshi nung ghonda ka film lir aser Christian tv aser YouTube channel nung angutsü.

'Spider-Man No Way Home' ajanga cr. 32.67 aazük

Mumbai, Luchii/December 17, 2021 (Agencies): Alima tesem ajunga nung MCU indang film tasen sayatsü anogo ka lia, December 16 nü India nung 'Spider-Man: No Way Home' sayaogo. Tang ama Covid-19 wara junga süshia maoba mapang ka nung, India nung iba film ajanga box office nung record tasen yangluogo.

Osang ajanga angazükba agi, India nung iba film sayar mezüing anogo nung sen cr. 32.67 (box office) aazüka liasü.

Benedict Cumberbatch aser Jacob Batalon den tanga cast dak alaka, Tom Holland aser Zendaya nati tongti shilem agiba film repringtsü asoshi movie hall (India) nung fans aika adenshia liasü.

India nung sayaba tanga Hollywood film tem den

medemdangra, 'Spider-Man: No Way Home' ya screen timba nung sayar asütsü. Tang tashi iba film ya screen 3264 nung sayaogo. Linük nung film shishilembaba maparen shilem 50 tashi dang achaayangdar aser item mepetmesü liaka, Marvel Cinematic Universe indang project tasenba ajanga record balala yangluogo.

2019 küm Avengers: Endgame takok ngua sayar sülen, India nung takok tulu ngua sayaba Hollywood film rongnung 'Spider-Man: Now Way Home' tanabuba kümogo.

Multiplex Association of India sangdong ajanga angazükba agi, cinema putiotsü nung movie ka atema audience temi kanga dang raktepa ticket jelia mekaa ayuba film rongnung Spider-Man tanabuba asütsü.

Sangdong tanga ka nung, tanü tashi superhero genre film rongnung 'Spider-Man' ya ajak dang tajungtiba lir. Avengers ama iba film ya tasa aser yimya balala amshia yangluogo. Iba film nung taoba Spider-Man film series indang character temi shilem agiba angutsü. Hindi aser English dak alaka, India nung iba film ya Tamil aser Telugu nung sayatsü.

India nung film audience tem asadangra, Marvel indang film sapur audience jenti lir. Iba den külemi tanga superhero rongnung aikati Spider-Man franchise ya sapuba asadangteter. India nung metro city dak alaka, south India state talisa Kerala aser Tamil Nadu nunga audience aikati MCU film tasen repringtsü asoshi ticket jelia mekaa yuogo.

International Religious Freedom... (Tapak 5 nungi...)

July ita tatabanglen US Tir, Joe Biden-i international religious freedom (IRF) nung tongti menden pezü atema ketdangsertem shima liasü; menden pezüji International Religious Freedom (IRF) atema Ambassador at Large ka, Monitor & Combat Anti-Semitism atema ketdangser ka aser United States Commission on International Religious Freedom (USCIRF) Commissioner ana lir.

IRF Ambassador atema

Biden-i Rashad Hussain shima liasü.

USCIRF Commissioners shima aliba, Khizr Khan aser Rabbi Sharon Kleinbaum naprongla ya meimchir temeden atema inyaka arurtem lir. Khan ya 1980 küm United States-i aoba sülen pai Constitution Literacy & National Unity Project tenzuka liasü. Pa ya Harvard Law School nungi graduate lir aser Supreme Court nung law practice asütsü temeden lir.

Ano külen Rabbi Sharon Kleinbaum ya New York nung aliba Congregation Beit Simchat Torah nung lenir. La ya New York City nung Commission on Human Rights Commissioner inyaker.

Ano Biden-i Anti-Semitism anema inyaksü asoshi Special Envoy, Deborah Lipstadt shim. Lai-a mapang talangka minorities reshikangshi anema inyaka aruogo aser laisa Emory University nung Institute for Jewish Studies tenzuka liasü.

Tarutsü nung rangloker inyaktsüla: Imolemba Jamir



Ungma (Mokokchung), Luchii/December 17, 2021 (TYO): BJP Mokokchung district, President, Imolemba Jamir-i, pei jangraba maparen koba nung südir süaka, tarutsü asoshi bilema aser takok angutsü asoshi rangloker inyaktsüla, ta lanurtem ayongzüka liasü.

Hokolbarnü, Soyim, Aonglenden nung 45buba Ever Green Club Intra Village Volleyball Tournament

tenzüksüba mapang, Imolemba Jamir-i, lanurtem dang zübazüema/ayong ayonga melii tarutsü nung rangloker takok angutsü asoshi inyaktsüla, ta ashi.

Alima kanga dang kara ainer/tejakleni odar, anungji t e n s a / m a p a n g / y i m y a melenshiba den jangyumedema aotsüla, ta pai ajungshia liasü.

Saisapong wadang nung shilem agir lanurtem dang tangazükba aser timtem ajak kaktetsüsa rangloker inyaktsü

asoshi ayongzüka mapang, Mokokchung district, BJP President-i, saipongertem dang national aser international sabang nung shilem agia tokteptsü asoshi tejangraba alitsüla, ta ajungshi.

Nagaland tesem balala nungi Volleyball team 10 agi iba asayamung nung shilem agidar. Iba sentong nung Mandals (assembly constituency), Morchas aser Cells ajak nungi ketdangsürtem denogo.

Naga nungeri temeten meshir... (Tapak 1 nungi...)

Indo-Naga mangatettep adokli nungi AFSPA 1958 benok aser iba ajanga Indian armed forces-i tetsübu aser talenba kecha melii inyaksangshia arur, ta NSF-isa ashi.

Indian armed forces-i Naga nunger tashiyim mapa inyakbaji onsara lir aser nungdakra NSF-i osang tejangja agütsütsü molunga lir. India kümzüka ayutsüba nisungtemi Naga civilian tem dak tenük yoka mapa inyakba angudang temolung raksar, ta parnokisa metetdaksü.

India lennir kari yimjak nung sepaitem pusema jembiba ajanga Naga nunger temolung yirutsüogo. Rara mayongidang Naga kin samatsütsü merangba ya onoki magizüker, ta NSF-isa ashi.

"Onoki Oting nunger atema temeten meshir aser Indian armed forces-i Naga nunger dak tashiyim mapa inyakba ken o ajak atema obendang shitak agütsütsü akhanger. Onokisa Armed Forces (Special Powers) Act, 1958 tangsa agientsü aser Naga yimten latetsü akhanger" ta NSF-i PM Modi dang ashi.

Iba memorandum ya India President indang Personal Secretary aser Nagaland Governor o Chief Minister nema agütsüogo.

NSF indang memorandum nungsa Indian armed forces-i Naga nunger dak tashiyim inyakba kar shia lir.

September 1960 Pochury Black Day: September 1, 1960, Phor nunger Civilian 6 reshikangshia südaksü aser September 3, 1960 nunga Yisi nunger nisung 3 zükset. Maneni, 16th Punjab regiment-i tai

maketba nisung 9 tepset aser parnok tasü mangji village council chairman'er kidang ayuba sülen mi agi rongdok. Hopta ka tsüingda tai maketba nisung 18 sama. Tanü tashi Pochury nungeri September 6 ya "BLACK DAY" amonger.

December 9, 1970: Cheswezy - Aiür 18 aser kibong kümer aliba tetsür 9 tashi India sepaitemi tashiyim agi shi nung medem aser tetsür 53 dak tim mesü kongshi.

July 11, 1971: Yenkei - Indian Army-i tanur tetsür 4 dak tenla ki pulpit nung tashiyim agi shi nung medem. Naga nunger atema tenla ka ya kanga dang temeshi lir aser iba ama menenmechiba magizüker. 1956 nung AFSPA mebenok dang iba yim ajunga rongdoksü aser yim daklirtem 1959 tashi arem nung dang jenoka ali.

January 8, 1987: Sheanghah Mokok - Civilian 13 tashi alu nungi adokdang Indian armed force-i amak. Iba lendong nung nisung 3 asü aser 10 kanga mejungi yiru. Parnok civilian ta ashi nunga India sepaitemi parnok dak injang khaloktsü.

July 9, 1987: Oinam - July 9, 1987 nü 21 Assam Rifles-i Operation Bluebird tenzük aser ibaji October 1987 tashi agi. Iba mapang nisung 27 kaset, tetsür 3 dak tashiyim agi shi nung medem aser tetsür 5 dak tim mesüi kongshi. 21 Assam Rifles-i nisung 300 tema reshikangshi, ki 125 rogdoktsü, 112 raksatsü, school 6 aser tenla ki 10 bensatsü.

December 27, 1994: December 27, 1994: Mokokchung - Civilian 7 kaset,

kinü tanur ka dena 5 mi agi rongset aser nisung 10 tema sama. Iba anogo dokan 89 aser ki 48, gari 17 aser two wheelers 7 mi agi rongdoksüba den aika raksatsü.

January 26, 1995; January 26, 1995: Akuluto - Tetsü kati küm ka kinü tanur nem mamatzü yongdaksü dang kaset aser kinü tanur teka sükdangtsü.

March 5, 1995: Kohima - 16th Rashtriya Rifles indang convoy nung tyre ka apokba sülen ghonda 2 shi sepaitemi amokbanga ayu. Iba mapang tanur asem dena nisung 7 kaset aser injang o bomb ajanga nisung 22 yiru. Maneni, sepaitemi nisung 15 dak teka sangshi aser 22 pur reshikangshi. Reshikangshirtem rongnung tetsür 14 dena liasü.

August 15, 1996: Tseminyu - 17 Assam Rifles-i Tseminyu South village nung tebur ajak RSA Ground nung adenshidaksü aser prangpong agi tuitter reshikangshi. Iba mapang injang 1006 khatok aser hand grenades 3 tashi nisungtem dak mereploksü. Idangji kaketshir ka dena civilian 4 tepset.

July 16, 2015: Wuzu - Akhegwo post nung Major Surinder Singh lenisüba kübok 46th Assam Rifles C' Coy-i injang mashii khatokdang kaketshir tanur ana Master Tuzali aser Miss Aso na kaset.

December 4, 2021: Oting - Nakmati atur nisung 8 tashi kidangi meyipa arudang 21 Para Forces-i parnok 6 kaset. Iba nikongdang search party nungi civilian 7 kaset aser tasüngji Armed forces-i tashiyim mapa inyakba anema lungkak aйдang ano civilian ka kaset.

Djokovic aser Barty nem 'ITF world champion' naroküm agütsü

Luchii/December 17, 2021 (Agencies): World No.1 Novak Djokovic nem 7benbuba atema '2021 ITF world champion' naroküm agütsü liasü. Kasa mapang world no. 1 (tetsür) Ashleigh Barty-i tanabenbuba iba title ajangzüktet, ta International Tennis Federation (ITF)-i ashi.

Djokovic, shibai otsütsüsa küm tenet tashi atonga world no.1 jenjang tongteta tembang, pai Australian Open, French Open aser Wimbledon takok ngua lir, saka golden slam ka angutsü asoshi Djokovic-i Tokyo Olympics aser U.S. Open final nung junga masayatet.

1978 küm iba award mezüng agütsü aser Serbia nunger Djokovic ya America nunger Pete Sampras den tie ser liasü. Barty, shibai taküm küm mezüng Wimbledon title aser Tokyo Olympics temeyoktep tarep nung bronze medal angu, lai 2019 küm iba award ngua lir.

"Taküm asayamung balala nung takok ngua kü team, kibong züngsemtem aser fans tem den pelatepba mapang, kü nem tenetbenbuba ITF World Champion naroküm agütsüba atema pelar aser khonang ama agizüker," ta Djokovic-i ashi.

"Asayamung balala nung ajangzüktetba atema pelar aser

nümatanga bilemer; iba den külemi Serbia National team atema asayatsü maongka tulu anguba ya tia taka ama züngshir," ta pai shisem.

Tang, Djokovic-i Rafa Nadal aser Roger Federer na indang Grand Slam record (20 ben) menepa lir aser sangküm Australian Open nung pai takok ngura, Djokovic-i Grand Slam timba takok angur asütsü. Djokovic-isa Australian Open tukuben kokdanga lir.

Maneni, Croatia nunger tarep Nikola Mektic aser Mate Pavic naprongla nem ITF men's doubles world champions agütsüogo. Tan season nung Nikola aser Mate nati title tuku tashi takok anguba sülen tena nem iba naroküm agütsü. Tetsür Tarep nung Barbora Krejckikova aser Katerina Siniakova nati tanabenbuba atema women's doubles award nguogo.

"Taküm küm bilemba ama jangratema asayaogo. Wimbledon, Olympics densema künati title tuku takok angu aser tebur tarep nung world no. 1 jenjang ajangzüktetba den ITF World Champions naroküm angur Croatia nunger rongnung küna mezüng kümogo. Iba tetushi ya tanga dang nung balaka tulu lir aser küna nem iba maongka agütsüba atema pelar," ta Pavic-i ashi.

Asian Champions Trophy Hockey: India semi-final tongogo

Dhaka, Luchii/December 17, 2021 (Agencies): Hokolbarnü, National Stadium, Dhaka kübok Asian Champions Trophy Hockey tebur round-robin tetoktepba nung India-i Pakistan madak 3-1 agi takok anguba sülen parnok semi-final tongogo.

Iba asaya mezüng quarter nung, Olympic bronze-medal angur team - India atema Dragflicker Harmanpreet Singh-i minute 13buba nung penalty corner ka nungi goal inoktsü. Iba sülen, minute 42buba nung Akashdeep Singh-i külem team atema goal tanabuba idakja liasü.

Tasembuba quarter atemtsü second 27 lia, Pakistan atema Junaid Manzoor-i goal ka inoktsü. Quarter tatembuba nung Pakistan-i penalty corner ana yoktsü maongka angu, saka India goalkeeper Suraj Karkera-i kanga bendanga agütsür nokdangba yong Pakistan-i goal ana tashi meinoktsütet.

Tatsüka lir, India team-ia penalty corner tanabuba angu aser Harmanpreet-i tanaben goal ka inokja India team goal 3-1 agi Pakistan tejakdang kümamadok. Iba asayamung nung, Harmanpreet-i Penalty Corner ka danga mezüdoki goal inokja asaya arudar.

Tang, Asian Champions Trophy Hockey table point nung India team-i point trok tashi ngua temaba jenjang tongtetogo. Kasa mapang, Pakistan team pur Japan den draw nung tembangba sülen, parnok jenjang pezübu nung lir.

2018 küm Muscat kübok ayongba Asian Champions Trophy final masayatetba sülen, India aser Pakistan naprongla takoker ama team anaprongla sentepa iba asayamung takok marok angu.

Kasa küm asayamung indang final masayadang, League stage nung India aser Pakistan na asaya liasü, kong India-i kidanger linük Pakistan madak 3-1 agi takok angu.

BILEMDANGANG

"Sempatepba tatembangji tasüba saka temeimibo kümzüksü lenmang teyur."